

今

世

說

今世說卷三

仁和 王 暉 丹麓 撰

文學

王敬哉爲禮部尚書猶好學寒宵擁爐篝鐙呶唔不  
輟諸公子環坐聽其緒論退而筆之爲冬夜語兒箋  
記時人見其書以爲其體製麤而賅其用心仁以恕  
其立言皆可爲天下後世法

王名崇簡直隸宛平人癸未進士善自  
謙下崇厲名教獎引後學孜孜若弗及

王阮亭于役淮陰泊舟秦郵湖風雪凝沍淒然動心

秉燭作歲暮懷人詩六十首夜漏未半屬草都就詞  
旨清麗間出奇峭語茶村杜處士語人曰使君才藻  
如許當是天人

程崑崙登焦山披草搜瘞鶴銘遺跡爲衝波撼擊缺  
蝕不完別購善本磨懸崖而刻之拉阮亭同遊相視  
叫絕憑高弔古各賦一章紀其事江干之人豔稱之

程名康莊山西武鄉人大司空鳳菴孫也名德博  
洽爲時輩所推蔣虎臣嘗評其文云禰韓祖馬兒  
視樊元孫劉官鎮江  
通守一時稱其廉平

曹秋岳稱李天生長律詩云風雅以來僅有斯製

曹名溶字鑒躬浙江嘉

興人丁丑進士官侍郎

李名因篤一稱子德陝西富平人應

薦博學宏詞考授翰林尋卽辭去

方渭仁少年負氣自豪里中時有文會每當同人榻  
管拈題苦吟面壁方與毛會侯輒握手修篁怪石間  
相與縱譚天下事或誦近所爲詩歌共質間以諧謔  
日向午猶不宵成一字同人來相敦迫方始振筆直  
書濤怒雲舒不可端倪

方名象瑛浙江遂安人性簡重天資穎異年十餘  
時卽能操筆成詩騷短賦爲鄉國艷傳祖書田少  
傅尤鍾愛丁未成進士益發憤讀書日與同好以  
文章相切劘四方人士翕然宗之會延試博學

宏儒選  
入翰林

毛大可過海陵至淮上時吏部張鞠存父子嗜詩有  
名園中秋夜會客數十人伎樂合作鼓吹竟夕毛倚  
醉扣盤賦明河篇凡六百餘言及旦淮上諸家傳寫  
殆徧宣城施愚山還自京師見之目爲才子

張名新標江南山陽  
人已丑進士官吏部

宗定九稱汪舟次文理不謬搖其枝字不妄舒其藻

宗名元鼎一稱海岑江南江都人恭謹朴雅與人  
交終始無失學有源本旁搜子史六朝奇聞僻事  
罔不手鈔心識家苦貧課一二老僕耕廢  
田春而食折而爨著書自娛足不入州府

汪名楫一稱悔齋江南休寧人性伉直意氣偉然  
通達治亂富于學問文章翰墨妙天下名公卿咸  
折節願交已未  
名試官翰林

吳志伊酷耽文籍綜博無遺嘗與吳錦雯會飲馬鳴  
九許錦雯問鄒段二字何讀志伊曰段也同本秦權

古文鄒許同本說文長箋錦雯歎服

吳名任臣浙江仁和人志行端慤博學而思深兼  
精天官奇王之術射事多中時人比之管郭薦舉  
博學宏詞  
考授翰林

錦雯名百朋浙江杭州人少奇敏讀書五六行並  
下操筆爲文數千言立就未嘗起草壬午舉于鄉  
久乃謁選兩爲司李都有異政改令南和尤得民  
心病沒于官百姓如喪考妣哭奠者比肩接踵紙

錢騰價一縣盡空東西各建祠祀之  
兒童亦登瓦椽爲小屋祠吳公云

禦兒朱韞斯誤娶同姓後十年覺得欲去其婦友人  
曹射侯陸麗京憐其雅非同望輕致唾井作書勸之  
因疏古名儒取同姓事會吳志伊後至曰王沉與王  
基聯姻劉疇與劉暵爲婚世人無譏緣非同原也一  
時服其敏覈

曹名序浙  
江石門人

吳錦雯博物洽聞貫串經史嘗與徐世臣輩創爲恢  
麗瓌瑋之文天下誦之號爲西陵體陸麗京目之曰

天下經綸徐世臣天下青雲吳錦雯

徐名繼恩浙江仁和人少擢茂才異等舉明經遭亂不仕隱于竺乾山中更名淨挺字偃亭天性英爽不耐憂煩嘗謂人非金石立見銷亡不若逃形全真肆志方外

顧景范著方輿紀要成吳撫軍先刻其五卷行世孫宇台謂其書若長河巨天珠囊照地古今興亡天下形勢瞭如指掌真人間所未有

顧名祖禹江南無錫人沈敏有大畧爲人奇貧而廉介寬厚樸摯不求名于時獨就著述凡山川險易古今用兵戰守攻取之宜興亡成敗得失之迹輯爲是書約一百二十卷論者謂九州記一統志諸書不能及也



吳名與祚字伯成浙江山陰人慷慨有才  
畧爲無錫令政聲卓絕由闕臬至閩撫軍

孫名治一稱鑿菴浙江仁和

人隱居教授爲人倫所宗

周櫟園觀察維揚簿書稍暇手一編不輟卽叅拜大  
僚酬訪賓客坐輿幙中往來市肆雜沓日以十數卷  
自隨歸語友人輒能舉其詳曲雖甚久遠偶晰一字  
之疑引據證明必指其出何書載何卷以及行墨之  
次第簡牘當命掌記依檢應手而出不差繁忝

周櫟園少時讀書恒以夜自更初至達旦方一偃息  
日則遊行登覽常謂人曰雲影天光皆足亂人心志

作此等功業須是一隙不露乃可靜悟

沈畱侯著藝林彙考人目爲經籍之禁禦文章之圃

田

沈名自南一字恒齋江南吳人珪璋特達博通今古登壬辰進士爲山東蓬萊令

楊以齋性樂閑適不近囂埃每讀莊子輒以爲能移

我情

楊名雍建字自西浙江海寧人乙未進士歷官貴州撫軍

宋旣庭謁龔芝麓于京師一見歡甚酒闌鐙炮相與分韻賦詩龔才思敏捷落筆如飛望之若神仙中人

宋名實顯江南吳縣人醇靜寡欲動止皆有常則  
才名蚤著三十舉孝廉以公車至京師輒攝衣據  
諸貴人上坐意氣岸然絕無所顧讓自名公卿訖  
四方游士慕之者無不日夜持謁到門以望見顏  
色爲幸

曹顧菴登南宮上第宰相愛其門地才華亟欲致之  
館閣於時安邱孟縣兩館師皆極天下之望恆傾心  
下之顧菴以文詞翺翺諸公遊士之間每一揮毫霞  
明玉映諸翰林皆自以爲不及也

王烟客插架千卷皆丹黃勘讎每當賓朋雜坐舉史  
傳中一事輒援据出入穿穴舊聞

王名時敏江南  
太倉人官奉常

分湖葉元禮爲鍾廣漢徵誅文援筆作引頗屬哀豔  
李武曾曰讀此如聞急風淒雨令人益增鄰笛之悲

葉名舒崇江南吳江人丙辰進士  
鍾名淵映浙江嘉善人

李名良年浙江嘉興人

林西仲少嗜學每探索精思竟日不食暑月家僮具  
湯請浴率和衣入盆衣盡溼始覺里人皆呼爲書癡  
陳椒峯讀書至夜分兩眸欲闔如綫輒用艾灼臂久  
之成痂每一顧益自奮不敢怠

陳名玉璠字履明江南武進人少有大志凡天文  
地誌兵刑禮樂河渠賦役諸大事莫不講求爛熟

言之媿媿賓客輻輳應酬旁午以至彈琴投壺嬉  
戲之樂靡所不爲偶有所觸發爲詩文旬日之間  
動至盈尺見者遜其俊才比于  
劉穆之云舉丁未進士官中書

吳漢槎最耽書一日數行然短于視每鼻端有墨則  
是日讀書必數寸矣同學以此驗其勤惰

吳名兆騫江南吳江人性傲岸不爲同里所喜  
其友或規之吳大言曰安有名士而不簡貴者

王西樵目錢礎曰詩高朗者譬諸星緯浩瀚者乃若  
江河有目共見終古如新

錢名肅潤江南無錫人學博行方嚴取予重然諾  
家居孝友落落有古人之節閉戶傳經門下皆知  
名士雅好述作博綜今古柏鄉魏相國推其理學  
爲鄒魯干城其論史諸文以爲陳君舉何去非咸

未逮也

紀伯紫言人生有三大事性命經濟文章柏鄉一身  
巖然直任之矣

紀名映鍾一稱慙  
叟江甯江寧人

魏貞菴名喬介字石生一稱崑林  
直隸柏鄉人丙戌進士歷官太傅

嵇叔子爲李太虛作閨園影賦縷縷數千言編珠貫  
玉地負海涵刻畫都盡李攜示趙洞門李叔則各舌  
橋不下

李名明睿江西南昌人壬戌進士歷官尚書  
趙名開心湖廣長沙人甲戌進士歷官尚書

徐野君嗜山水遊輒有記嘗以示呂翼令呂曰數日  
日力之勞省却古人多少筍輿蠟屐

徐名士俊浙江杭州人少奇敏于書無所不讀發  
爲文跌宕自喜好爲樂府詩歌古文詞與人交如  
坐春風飲醇酒有問字者傾心教之有一長可錄  
者不惜齒牙獎成之故所至逢迎恐後爭禮爲上  
賓日有課程雖老勿替讀書無論卷葉多寡必自  
首至末以覽竟爲率五經歲讀一過有徐廣之風  
曾遇異人魯雲陽授以導引法年近  
八十蒼髯丹唇顏面鮮澤如嬰兒

鄒程邨語言妙天下小詞單文令人色飛神豐

鄒名祗謨字許士江南武進人戊戌進士天資穎  
異過目靡所遺忘上自經籍子史下逮藝文雜著  
旁及天文宗教百家之書細及古今人爵里姓氏  
世次年譜無不悉記至性沉摯意氣真篤與人交

久要  
不忘

鄒程邈讀書如漢主按獵不至野盡山窮囊括其雌  
雄不止

惲正叔與鄒程邈同客湖上鄒向惲誦王丹麓不去  
口後惲數過王見其兀坐一室時時握管操纂志在  
千古歸與鄒言交歎爲奇士

惲名格一名壽平江南武進  
人工詩文通書法畫尤絕倫

王丹麓博學擅才藻一時名聲滿江左居北郭爲往  
來舟車之衝四方士大夫過武林者必先造其廬問



字納交停輒不忍去

方渭仁嘗稱松溪子爲人著述名海內而非聖之言不陳交遊盡天下名流未嘗向俗客一通姓字來元成遇未見之書雖至典衣購之不吝夜閱晝錄必速終卷而後快

來名集之浙江蕭山人生有異質過日成誦庚辰成進士給事瑣闕謝政後日手一編探索討論得則豁然開朗肩宇飛動不得則憤悶累日寢食俱廢每有譚議舉一事必批根導源窮詰流末條條然如說家人事如按驗官府文牘如自訴肌膜所痾癢如數壯貝聽者輒爲爽然

黃太冲家多藏書裝本厚二寸灑墨塗乙叅互散亂人求不得太冲獨省記之季弟澤望丹黃工緻篇幅

精整訖一書更一書品第循環不輟

太冲名宗羲一稱梨洲浙江餘姚人父忠端公死奄禍太冲上書訟寃聲振國門年踰六十尚嗜學不止每寒夜身擁緇被以雙足置土爐上餘膏熒熒執一卷危坐暑月則以麻帷蔽體置小燈帷外翻書隔光常至丙夜所學上本五經

旁羅百氏俱能採精攬微得其本末  
澤望名宗會善飲磁栝瓦樽置几右佐以鹽豉讀書每數百行仰一栝自朝及夕顴頰薰潤薄暮陶然步阡陌吟嘯爲常

高雲客少遭喪亂自江左還舊鄉補衣蔬食塊處蓬室中采搜隱逸輯爲高士續傳鑒別精嚴論者謂其才識不讓士安

高士續傳起晉至明  
凡得一百四十三人

興化宗子發陸懸圃以高節能文章名于江北四方  
士稱曰宗陸

宗名元豫持高節獨  
行古道虛懷善下人

陸名廷掄魏冰叔稱其文以直道  
自任有毅然之色與其爲人相似

賈靜子負奇好大言嗜酒不拘繩墨常自許得爲宰  
相當一年平寇三年可盡撤諸塞上兵里人大笑以  
爲病狂乃感憤著八陣圖數千言

賈名開宗河南商邱人自稱野鹿居士少落拓不  
羈慕司馬相如之爲人學擊劍鼓琴嗜遠遊已讀

書爲文詞力學好問數十年  
卒軌于正天下以純儒目之

王于一自謂讀書三十年方悟慚愧二字

董文友道黃雲孫文如王謝家富貴子弟便極奢華  
無裘馬紈袴氣又如渴虹飲水霜隼摩天變幻天矯  
令人睫驚

董名以寧江南武進人少負才望豪邁感慨不可  
一世然當其恤交遊急然諾輒復纏綿婉篤比于  
膠漆博覽強識著書滿家  
執經問難弟子恒數百人

黃名永一字艾菴江南太倉人乙未進士孝友深  
摯交情剴切和神善氣日坐人于春風生平無疾  
言遽色毀譽不經其心  
名滿天下而守如處子

毛季蓮舟抵小孤山逆瀾蕩楫柔不可上索漁人舴  
艚隨波心沉入已乃登作賦一篇還示吳慶百吳讀  
竟歎曰新穎動人但覺洪濤春激胸臆

毛名遠公浙江蕭山人丁巳孝廉  
吳名農祥浙江錢塘人負軼才世推莫匹

江子九郊居嘗製百籤寫古人于籤面風日晴好輒  
煮茶焚香隨取籤中人相與罄彼我而評論之竟日  
而罷名曰雲社

江名思令浙江仁和人慷慨負志畧辛酉舉于鄉  
官黔陽令亂後絕意仕進徙居北墅荒野寥落孤  
介自高富貴人不敢輒  
有所遺卽遺之多不受

陸儼胡自許儷語爲海內少雙

陸名繁昭一字拒石浙  
江仁和人 大行鯤庭子

安靜子讀書如浪子入烟花場中不知流蕩何所

安名致遠山  
東壽光人

安靜子稱櫟園詩情浮其貌意勝于法遠想長思徑  
致獨絕

吳介茲云讀吳楚人詩如入冰雪窖使人冷畏

野人名嘉紀字賓  
賢江南泰州人

朱若始讀史尤愛史記漢書壯歲乃專攻漢書曰太

史公如神龍變化不測孟堅文整齊典贍故可學而  
至

朱名溶江

南華亭人

錢葆芬總角卽好倚聲酒肆粉墻倡家團扇每因典  
會輒有斜行

錢名芳標江南華

亭人丙午孝廉

徐子能和牡丹詩得百餘首貫花結鬢香粉散落吳  
人傳寫爲之手馥

徐名增江

南吳縣人

包飲和讀書有常候比讀必過丙夜常授書友人宅  
其宅高樓當城隅販傭僦焉每丁夜渡江其婦睡醒  
聽包度紙聲并竹中鷓鴣輒曰鷓鴣未呼包二先生尚搜  
書起徐徐後販婦聞包死出涕

徐武令喜著書苦無由得錢易楮翰常于破几上起  
草東麻濡煤作字

徐名汾浙江仁和人一稱管涔子一稱京山人一  
稱炎州學者一稱嘯癡一稱髯徐少秉異資九歲  
通魯論易象十三熟六經左國十五誦文選  
秦漢百家書善騷賦十八歲工詩古文辭

方正



李映碧童時讀日記故事見漢湖陽公主坐屏後像  
輒舉筆抹其面師怪問對曰事諧則移天卽不諧亦  
移心吾實耻之

李名清一字心水江南興化人辛未進士歷官廷尉嘗列刑垣數上章論祥刑獄中人見疏無不感涕粘其疏語于獄街之壁時共讀之合掌誦佛以過後以風節著稱

蔣慎齋至性過人類多密行雖齋居獨處皎然不欺

蔣名永修一字日懷江南宜興人丁亥進士官學使

王邁人居官強項不屈任意爲其難八年不通京師  
一字所遷皆極邊卽單車就道不惕利害家計蕭條

幾不能朝夕亦不問也

王名庭字言遠浙江嘉興人少貧舉孝廉十四年  
貧日甚杜門局守無雜營分好日事詩古文笑歎  
歌咏畱連不去中已  
丑進士累官叅政

何蕤音官侍御與張祖望友善人短之曰此君遺落  
世事傲慢難近何曰今人不少便佞吾正喜其傲慢

何名元英浙江秀  
水人乙未進士

張名綱孫一名丹字秦亭浙江仁和人美鬚髯長  
尺餘手足胸背有毫寸許夏月好坦腹臥大樹下  
視富貴若不介意性恬淡不樂交遊好詩賦古文  
辭喜山水深溪邃谷不避險阻每得意長嘯而返

徐羽儀九歲善屬文卽見知邑令益自攻苦同舍生

或窺園徐正色以諫生侮之曰童子何知徐自恨誠不足格友爲之不食同舍乃慚謝

徐名一鴻江西懷玉人生而早慧容狀魁奇經明行修不枉道以逢世恒自歎曰吾讀書獨不得明道爲憂耳何慕富貴富貴能福人亦能禍人嘗應舉渡鄱陽湖風變舟覆遇救得免同舟半皆溺死徐覓其屍衣冠殮埋又爲文以祭之方去

胡勵齋納言歸里居恒端坐一室左史右圖而外若聲色貨利徵逐遊觀之樂去之若浼菽粟布被無異爲諸生時

勵齋聰明強記於書無所不讀讀已終身不忘旣杜門謝客惟以古爲歡自經史子集以及老氏浮

屠天官形家醫卜字義音韻歌

曲無不手自裁定勒爲成書

陸麗京持已端潔嘗教授臨平沈氏有伎爲主人所  
索就匿陸帳中陸危坐讀書就帳外書瓜田李下四  
字去矜披帷見之頗相欽歎

豫章陳伯璣避亂移家與劉遠公流寓蕪江杜門窮  
巷雅志坐嘯不輕以言干人有引其家伯玉事爲詞  
者陳曰吾寧愛吾琴耳因署愛琴于旅次并名其詩

陳名允衡江西建昌人幼負俊名才雄等輩

父立字直聲動天下風采凝峻有山斗之目

柴虎臣生平拙于逢人少營幹疎懶率素於儕偶間

好面折不議顧胸無俯仰人亦諒之

柴名紹炳一稱省軒一稱翼望山人浙江仁和人  
生而奇敏少喜文詞馳騫聲聞中年悔之有意求  
道以樸實恬澹爲歸天質素羸軀短小膚色不華  
而肝膈之要無殊于大廷屋漏與人言未嘗不勉  
以爲善動嫻禮則準于  
賢聖居然有閩洛之風

翁仲謙性孤介不與俗諧家酷貧值歲儉不能餬口  
終日啜水而已鄰近或有招之食者謝不赴也嘗曰  
耐飢易耐俗子難惟徐介白顧茂倫餉之方受後病  
卒茂倫賣古琴殮之

翁名遜一字研石江南吳江人能詩善書畫不入  
格而有高趣介潔方正雖貴遊至其門弗見也

徐名白吳江人朱長孺稱其嶽  
崎歷落格韻在東野閩仙之間

顧名有孝吳江人志氣邁往身長七尺餘妙擅經  
術且能出入古今文章其任事幾無所遺力故人  
士皆歸之

孫豹人應 召入都初以老病辭不許既將還籍復  
有年老授銜之命吏部集驗於庭孫獨臥不往旋受  
敦促乃徐入逡巡主爵者望見其鬚眉皆白引之使  
前曰君老矣孫直對曰未也我年四十時卽若此且  
我前以老求免試公必以爲壯今我不欲以老得官  
公又以爲老何也衆皆目笑其愚孫固自若

孫名枝蔚陝西三原人身長八尺聲  
如洪鐘龐眉廣顙以詩文名天下

今世說卷三

終

今世說卷四

仁和 王暉 丹麓 撰

雅量

繆念齋初擢 廷對第一其意挹挹益下人自奉益  
菲薄欲然若有不足于懷者計甫草見之歎曰念齋  
之志行遠矣

繆名彤字歌起江南吳縣人  
丁未狀元及第授官修撰

汪蛟門居百尺梧桐閣隱囊塵尾頌酒彈碁興致蕭  
遠飄飄欲仙



汪名懋麟字季用江南江都人丁未進士官中書舍人事親孝事兄恭擇人而友之敬而能和其立

心澹蕩

而高明

高念東家般陽每風日晴和自跨一驢出遇嘉石濃陰卽繫驢而臥見者不知其爲貴人也

高名珩字慈珮山東蒙陰人性方嚴骨清神佚氣靜情疎少年登第筮仕館閣歷任大僚屢奉簡命出入中外三十餘年所在聲名赫奕然不以富貴貧賤動其心士大夫高之

王匡廬不恒爲詩每遇林臯清曠襟抱悠然輒復有作諸子或請編錄王諭之曰吾寫懷送抱如絃之有音所懷旣往則絃停音寂何庸畱此枝贅爲耶

王名與救山

東新城人

丁葯園初至靖安卜築東岡躬自飯牛與牧豎同臥起暇則乘牛車行遊紫塞中手周易一卷吟誦自若

丁名澎字飛濤浙江仁和人乙未進士官法曹無事日作詩與宋觀察荔裳施大叅愚山嚴黃門顥亭輩稱燕臺七子名滿京師時上方冊立西宮念無嫺典禮者調入東省兼主客貢使至譯問主客爲誰廉知丁持紫貂銀鼠美玉象犀從吏人易其詩歸國長安縉紳以爲榮謫居五載略無遷謫狀躬耕自樂灑然有箕山之風

方穉官天懷坦易飲酒數斗不亂每良辰令節攜故人詣獅山劇飲歡呼曠然自放間獨行道中諸田父

相謂曰村釀新熟翁能從吾飲乎但苦無佐酒具方  
亟歸左提魚右持葢行烈日中就其家酣醉達旦始  
罷

周櫟園雪夜坐念室中獄事正急鐵衣周羅戶外方  
與黃山吳冠五共爲詩漏下數十刻不止嘗對臥薄  
板上已解衣臥忽聯句成兩人擁敗絮從口吻中溼  
不律露臂爭書薄板躍起短燭撲滅一笑而止

周又嘗坐獄堂下健卒得獐立銀鑰累累呼暑聲  
如沸手拳據地顧伍伯乞紙筆作送客遊大梁詩  
三十三絕句投筆起  
對簿詩語皆驚人

吳名宗信江

南休寧人

鼎革初兵戈四起人皆裹糧避山谷間徐竹逸與弟  
竹虛獨守敝廬晝則力田夜不廢讀儼如太平之世  
其避兵他處者率多受警歸竹逸語弟曰吉凶悔吝  
生乎動于今益信

董蒼水渡洞庭至鹿角山風大作波翻浪湧上流覆  
舟蔽湖而下僮僕震懼無人色董坦然危坐賦二詩  
投湖中竟得無恙數時輒行三百餘里見者疑有神  
助

董名俞一稱樗亭江南華亭人遂初少宰孫也童時喜讀古人詩畧上口卽能爲聲偶之言父師見而叱之乃吟咏自如不少奪庚子舉孝廉與兄進士鬪石並以才名顯後坐公事摧挫不得用于世卜築南村方塘小榭竹翠花深灌園鋤菜歌嘯自得雖突烟常冷意豁如也

徐羽儀讀書靈鷲山夜陟北峯望月有虎怒嘯山谷震動或勸之避徐笑曰虎雖猛獸焉能齧人人惟畏虎虎故齧之意氣自若

明末兵亂有大猾招集散亡寇浙東西素與沈康臣有卻懸賞購沈急沈毅然儒衣冠往見曰某來矣殺一書生何購爲猾奇之大笑縱飲而釋

沈名胤范一稱肯齋浙江山陰人丁未進士官比部好學善讀書尤以詩聞

徐野君性坦易不與人忤每遇能文章者與言文章  
曉音律者與言音律善琴奕丹青諸菽者與言琴奕  
丹青諸菽常獨行村落山顛水涯值村翁溪叟樵牧  
童豎亦與談說周旋終日無倦色

吳錫孺閭失火時夜闌延燒將入宅吳起視從容還  
內取朝衣冠帶整束而出光燄燭天中鞠躬四頓首  
火隨熄

吳名晉剡江南宜興人壬辰進士官司李

朱子殷瓶無宿春歌呼笑傲不改其樂宋旣庭稱爲積學辯才今日之樓君卿也

朱名輅浙  
江嘉善人

王丹麓意思深遠常有以自下與人言未嘗先一語名士讌集故未嘗不在竟日冲然若不知其在座者吳六益負郭而居堂曰梅花書屋清谿喬木映帶前後每當橫潦載塗堦下水深至駟車馬到門罕得見吳讀書其中意泊如也

吳名懋謙江  
南華亭人

鄒程邈爲晉陵甲族會有蜚語中之者一日散萬金立盡鄒四顧壁立舉酒自慰曰田園無存幸吾賓客尚在耳

諸駿男嘗同姜真源過金山颶風大作舟直觸郭璞墓石時真源在別舟意諸必大惶怖諸方吟嘯自若作過金山詩

諸名九鼎一名墨字鐵閭浙江錢塘人才鉅而學贍貫穿經史百家之言爲人英偉倜儻有不可一世之概

姜名圖南字滙思浙江仁和人官御史

吳郡葉林屋以選詩遊四方其弟尚從行每同宿共



一布被客雲居山夏月無帳窗外聚蚊薨薨至旦卒  
無一飛入室中其友朱若始過宿嘗之信乃賦能弟  
詩贈焉

葉名開江南蘇州人寓居金陵  
工詩文好游尚字豈僧以畫名

李鄭生游學白鹿洞數年不歸獨居攻苦夜半孤燈  
忽見緋衣滿室不之動吟誦自如

李名夢蘭 修湖人家貧喜讀書弱冠舉孝廉  
公車不第策蹇南歸務益砥礪讀書農時率一僕  
躬耕自給間入城禿衫椎結行于市人不知其爲  
名孝廉也善奕能詩工書法人多求之日不暇給  
所見緋衣或疑濂溪  
晦菴諸公降鑒云

黃大宗游楚嘗月夜破浪江行爲戍卒所追扣舷吟  
嘯神思自若

黃名之翰江南山陽人是兵部蘭巖子多才好游  
跌宕自喜性尚然諾篤氣誼與貧士交解衣推食  
無倦容

識鑒

丁葯園知中州貢舉闈中搜采瑋異得一卷奇之同  
考以波瀾簡質度其人已老請置于乙丁曰才與膽  
峙豈老生所辨必年少知名終爲大器榜發乃廬陽  
李湘北天馥也同考出語人口吾以世目衡文幾失

此佳士李果方弱冠名振西清以文章道誼服天下

李號容齋江南永城人戊戌進士歷官侍郎著述自豪讀書不輟好賢下士海內仰爲人宗

王匡廬家居教諸子弟絕不以時義程督之詩歌古文各徇其意親申中或諷曰諸郎君幸蚤露頭角何不令銳力場屋願爲爾耶王怡然曰君勿言彼伏獵侍郎詎是寧馨物

周櫟園被讒詣詔獄幾死獄且成時父赤之家金陵客爲之憂赤之曰吾今固甚念之然吾生平無一念足死吾子吾子又類我於理不死行當雪耳且義命

有在吾卽日夜憂之豈能遂脫吾子卒與客飲酒自若已而事果得雪竟如其言

赤之名文煒素行屹立人稱爲如山先生周曰吾如山哉吾乃坦然者耳因以自號少以文自豪尤喜賓客常數致千金爲人緩急立盡初官諸暨簿尋忤令左遷王府官屬會母喪過哀竟以病棄官教子成名進士於所居爲昔有園與向時賓客觴詠其中謂之秦淮釣侶又豫置一棺當風日晴好被酒入臥命諸孫羣繞呼之或擲梨棗出使競相奔拾以爲笑樂更自撰爲墓誌銘

邵薪傳言向子平未是達人旣知富不如貧貴不如賤便應知死賢于生

邵名燈江南常熟人

壬辰進士官刑部

趙洞門爲御史大夫車馬輻輳望塵者接踵于道及  
罷歸出國門送者纔三數人尋召還前去者復來如  
初時吳藺次獨落落然不以欣戚改觀趙每日送之  
顧謂子友沂曰他日吾百年後終當賴此人力未幾  
友沂早世趙亦以痛子歿于客邸兩孫孤立藺次哀  
而振之撫其幼者如子字以愛女一時咸歎趙爲知  
人

吳名綺江南歙縣人官湖州守爲治簡靜放衙散  
帙蕭然洛誦繩牀棊几燈火青熒吏人從屏戶窺  
之不辨其爲二千石也喜與賓客遊  
四方名士過從無虛日卒以是罷官

友沂名而怵長子  
詩賦官中書舍人

吳漢槎少時簡傲不拘禮法在塾中見人所脫巾冠  
輒竊取溺之其師計青麟大加捶楚後見吳所作膽  
賦乃嗟賞曰此子異時必有盛名然當不免于禍至  
丁酉科場事起衆謂計知言

計名名江  
南吳江人

林視公自爲生藏每佳日命僕夫荷齎攜一卷詩日  
造飲其所人過問之林笑荅曰卜吾真宅愛此寂居  
遊雲翩翩古今無期聞者謂有劉參軍陶彭澤之風

林名岳隆浙江鄞縣人侍御祖述子有文名兄弟  
四人兄名棟隆官少宰弟曰萬葉能詩工樂府

有客薦相者陳生于毛稚黃謂其術比許負毛曰貧  
賤吾所自有富貴本非所望天壽不貳修身俟之僕  
自相審矣政無煩此公饒舌

賞譽

宋荔裳標格意氣風流文采並足推倒一世尤悔菴  
曰爲東海偉人

尤名侗字展成江南長洲人文辭超軼經術醇深  
弱冠名播天下所交皆人倫英傑初仕永平司李  
後以博學宏詞科特授翰林朝野榮之

汪鈍翁目王阮亭風姿玉舉逸藻雲飛

王阮亭和漱玉詞有郎似桐花妾似桐花鳳語長安  
以此遂有王桐花之目

王詞又有春水平飄綠夢裏江南綠新婦磯頭烟  
水綠鄒程邨歎曰昔應子和名三紅秀才今更不  
當稱三  
綠耶

吳默巖謂讀王阮亭七題名如乘騏驥處處制以銜  
勒而逸氣自在

吳名國對江南全椒  
人戊戌進士官翰林

李坦園目毛會侯文精鍊有法度不爲枝葉之詞



李名蔚直隸高陽人丙戌進士官大學士德器淵粹退食後手不釋卷詩文爲海內所宗

盧西寧少有異秉斷乳後不食他物晝夜飲酒三五

升一吸輒盡家人謂之酒仙

盧名琦字景韓浙江仁和人人生三歲未嘗聞啼聲迨五歲能語遂與兄同就外傳讀書往往不肯讓其兄東方甫曙每伺兄未起輒先至塾中復所肄書年十二應省試人多有物色之者中丁未進士歷官侍講學士

孫忞庭稱唐濟武詩刻鍊之工山顰水笑

孫名光祀山東濟南人

乙未進士歷官侍郎

唐名夢賚山東淄川人生時父夢神人授以傳說故命是名少負異姿比長卓有匡濟之畧己丑成

進士官翰林言論丰采雄跡

一世舉朝咸以公輔目之

張禹木守會稽言論讜直顧且菴目爲暑月懷冰凜

凜有霜氣

張名三異湖廣漢陽人已丑進士爲政多奇績有古良吏之風

周櫟園稱金冶王抗厲希古不可一世

金名鼎江南鎮江人治制舉業不屑屑進取好爲古文辭人有購之者而授之如宿構性不妄交其在白門惟周櫟園吳衆香盛此公相往來他客值之瞪目直視卒不交一語強與語輒遭詬罵世以此怪之

許有介稱周櫟園秋月澹面春風扇人

許名友福  
建侯官人

儲同人稱周立五其德足以敦天下之鄙其學足以  
正天下之詖其文章足以起天下之衰

儲名欣江  
南宜興人

周名啓鶴江南宜興人弱冠時顛未高兩頤逼而  
秃而有槁色鄉人竊笑者曰此黃冠相耳周聞之  
若弗聞也年三十二猶困童子試借其父荆南旅  
宿南城外倉橋側夢中見一雉冠絳衣人右手操  
刀左手提一人頭鬚髯如戟至榻前易頭去以手  
所提頭雨其頸周大驚持父足疾呼及舉手摩之  
頭如故凜凜者累日未幾顛漸高兩頤骨漸豐鬚  
鬣鬢然日益長越年餘又夢一白鬚老者冠緇冠  
執長尾塵隨一金甲人語曰吾來易而腹語訖金  
甲人抽所佩刀啓周腹出滌其臟腑而復納之既

納以方竹笠覆腹上復取釘椎釘四角周夢中聞  
響聲丁丁而怪其無痛也釘畢白鬚老者揮麈拂  
而祝曰清虛似鏡原本無塵忽釘與笠豁然有聲  
周寤自是文學日進歷試兩闈皆獲售歷官侍講  
士學

朱長孺見徐電發歎其天才駿發語顧茂倫曰此今  
之郭功甫也世有王荆公定當激賞其才邀致爲上  
客耳

朱名鶴齡江南吳江人貫穿六籍  
折衷百氏著書滿家羣推學海

徐名鉉江南吳江人英姿玉立倜儻有大志好古  
博學通經濟弱冠才名蔚起搖筆數千言倚待立  
就應薦博學宏儒考授翰林

毛大可稱顧茂倫人倫之雅鑒品目之善裁

毛稚黃道吾家大可生負異才挺然埃壚之表其頰  
視鄉之人猶鵬鷖之繫而就雞羣也

朱近修稱丁菡園風義高舉雄眎菘林天爲加絢地  
爲加藻

張祖望目陳其年其行敦篤而立誠其材灑瀚而英  
精其氣盤礴而靈淑

陳名維崧江南宜興人美髭髯氣沖而盛神粹以  
和才情志意如江河之浩浩莫可砥竭已未召試

官翰  
林

王丹麓稱張祖望賦盧枏以上張衡以下潘岳郭璞之儔

吳錦雯稱蕭尺木亮節高致博雅之宗

蕭名雲從江南蕪湖人

吳錦雯目朱人遠渥洼龍種丹穴鳳雛

朱名爾邁浙江海寧人

梁仲木至武林一見孫宇台便披衿契謂人曰若孫子者所謂雲中白鶴那根矩劉士光之儔也

梁名以楠直隸宛平人任俠仗義博覽洽聞與弟以樟並有高名江淮人士皆宗之

有人問孫宇台曰朱朗詣仗氣絕俗揮斥一切何以  
不罹禍患曰朗詣不矯矯立崖異故能居磨涅之中  
而無淄磷之損蟬脫塵垢非凡識所及

朱名士稚浙江山陰人金庭相國之孫爲  
人慷慨不負然諾貫穿掌故有良史之才

西陵諸名士風雅都長虎臣稚黃去矜尤精韻學虎  
臣作古韻通去矜作東江詞韻稚黃作南曲正韻麗  
京歎曰恨孫恂周德清曾無先覺

陸麗京度曲四劇薄遊武塘錢仲芳大集賓客卽令  
吳伶演唱新聲豔發絲竹轉清四座之間魂搖意滾

宗定九稱張子羽丰度標舉屐齒皆韻

張名翀一字圖南江南江都人流寓白門以畫名于時性澹簡有塵外趣客過訪茶瓜間進輒畱連日竟

龔半千稱屈翁山龍章鳳姿輝映南海

龔名賢一稱柴丈江南江寧人  
屈名大均廣東南海人

諸駿男幼有文藻警敏不凡其舅祖嘗賞之曰子居馬市故自龍駒

諸駿男道我家阿虎洵是虎癡

諸駿男云王丹麓精鑒朗識如冰壺映物無不澄澈



王丹麓爲陸蓋思妹婿兩人刻意耽述作時人爲之語曰王丹麓寤寐千秋陸蓋思神明萬古

徐武令云讀丹麓片言隻字如噉梅腊可以香口

李杲堂嘗言說經無雙名擅八龍昔有慈明今見充宗

李名都嗣浙江鄞縣人風骨不凡年十二三能詩卽有秀句父桐官儀部及殉難喪從省至放聲一

哭遂絕意人

世穿竄草石

充宗姓萬名斯大浙江鄞縣人

世目許九日天才雋拔風格雄峭

許名旭江  
南太倉人

孫介夫稱嚴修人其澹如菊其溫如玉其靜如止水  
其虛下如谷

孫名金礪浙  
江慈谿人

嚴名允肇浙江歸安人七歲受經十歲能文十一  
游庠序十五六百家諸子淹貫畧盡二十三舉孝  
廉二十四成進士既生長華胄又早  
得名好學不倦著述益工官邑令

吳門之有永叔兄弟猶建安之有二丁平原之有二  
陸時人號稱雙珠

永叔姓衛名泳一稱懶仙江南蘇州人  
落落穆穆端介自守羣推篤行之士

宋去損云方叔歸述雪舫盛事如自旃檀林來舉體皆香

方叔周姓嬰名  
福建莆田人

許彛千少便岐嶷總角風氣更進嘗詣從祖原孝原孝索冠見之左右曰孫見祖何復著此原孝曰此子是許氏南來之秀

張帖思美才清尚馬圖求比之叅軍謝寶逸少王珍

張名新杼馬名駿並江南  
山陽人同舉已酉孝廉

鍾百里稱陳蝶菴才酒俱壯殊足念

鍾名震陽江南宣城人

陳名周政字子鵬四川營山人

陳吳興嘗言浙東之有吳賜如猶西華有青柯坪黃河有碣石蜀江有濫湏堆也蓋有削夸爲阻之功真文苑之禦侮

吳名之器浙江義烏人壬午孝廉

今世說卷五

仁和王暉丹麓撰

品藻

宋旣庭與宗弟疇三俱以孝廉知名時稱大宋小宋  
或問汪鈍翁大宋何如人汪言阮思曠都不及真長  
逸少而能撮有諸人之勝

疇三名德宏江南  
長洲人辛卯孝廉

或問計甫草侯二宋三可方古何人計戲爲題目曰  
研德如張子布疇三如魯子敬

侯名元泓江

南嘉定人

陳其年與汪鈍翁論六朝之文詞雄旨洽鈎入深微  
多出諸賢尋賞之外時冒樸菴在坐傾聽不置陳遽  
掀髯謂汪曰與子納交十年今夕始稱知己

冒名襄一稱辟疆江南如阜人孝  
友易直能文章善結納知名天下

胡旅堂與龔總憲書云研德疇三吳門之兩玉樹門  
下見之定把臂入林半千自是我輩人氣不諧俗非  
時賢所識過蕪城時試畱盤礴知其蕭遠耳

胡名介字彥遠浙江杭州人少有高志  
立名節寡雜交遊遊公卿間名譽甚盛

毛大可目史訥齋雖睦居家事父怡愉不聞嘻嗃有  
似陳季方把臂堪托以妻孥似朱生見利思義不因  
人炎熱似童子鴻嗜酒疎脫每一飲必陶然盡醉而  
諸務不失簡則有似張黃門訓諸經百氏鈎深致遠  
可使擔囊負笈執經問字者不絕門舍雖傾筐倒篋  
隨叩隨應猶然鼠壤有餘物似馬季長

史名廷栢浙江蕭山人弱年蜚聲文林豪蕩驅遣  
領袖東南凡人士讌會有所諧記不得史名不就

王西樵嘗稱林鐵崖異人者三鬚眉奇古畧如李伯  
時所畫羅漢相則異在容貌下筆落落能爲肆侃俶

詭之詞出入于孫樵劉蛻之間則異在文筆每當讌會竹肉間作或值徜徉山水之際時而意得忘言如釋迦拈花達摩面壁時快論斗發又如春雷奮蟄奇鬼搏人則異在性情言語

曹子顧子閑兄弟人目爲雲初王謝風貌阮何

子閑名爾坊意思蕭散不與外物相關尤梅菴嘗以外期內潤目之三十六歲早卒其子壽士英姿好學詞翰並優中已未進士官翰林

曹顧菴目王丹麓遂生集爲鶯苑杠梁文津爲藝林

餽脯



萬履安有子八人長孫貞一並稱令器李杲堂嘗論  
之曰粹然有得造次儒者吾不如公擇事古而信篤  
志不分吾不如充宗足以文章名世居然大家吾不  
如貞一至若學通古今無所不辨則吾不如季埜

姚江黃太沖每言浙東門風之盛莫過萬氏履安  
名泰一稱悔菴生有異稟美風儀進止不失尺寸  
舉丙子孝廉亂後遂隱居不仕文行爲天下模楷  
李杲堂論其風格比之東漢郭有道黃徵君云  
公擇名斯選顏色充豫內腴外

豐被服雍容出言款款有序  
悔菴書法最斐盡諸子中惟允誠得其傳允誠名  
斯倘欲言理學則就公擇欲論經學則就充宗欲  
從衡今古則就季

埜季埜名斯同

貞一名言生而不凡乃祖嘗言是兒魁梧當不負吾門比長性嗜學好爲古文家言每下筆獨出冠時黃太沖數稱其文爲有戴剡源歸震川風味

明州有鑑湖社做塲屋之例糊名易書以杲堂爲主考甲乙樓上少長畢集樓下候之一聯被賞門士臚傳其人拊掌大喜如加十賚

世稱莊澹菴所至如墨濡素練便出雲烟

莊名同生江南武進人丁亥兄弟同舉禮闈時年最少入直史館稱雙璧人澹菴能自傾下所至無問識與不識折節論交詩文書畫脫手淋漓士林爭寶惜之

黃俞邵目周櫟園吏事精能撫戢殘暴則如張乖崖

其屢更槃錯乃別利器則如虞升卿其文章名世領  
袖後進則如歐陽永叔其博學多聞窮摛遠覽則如  
張茂先其風流宏長座客恒滿則如孔北海其心好  
異書性樂酒德則如陶淵明其敦篤友朋信心不欺  
則如朱文季其孺慕終身友愛無間則如荀景倩李  
孟元至其登朝未久試用不盡則如范希文而遭讒  
被謗坎壈挫折又如蘇長公

黃名虞稷福  
建晉江人

王丹麓蚤年高隱甚負才望趙千門亟稱之比爲天

地私蓄

趙名倫山東萊陽人  
戊戌進士官司李

黎媿曾文章雄視海內徐巨源嘗曰漢陽李文孫長

汀黎媿曾

黎名士宏福建長汀人  
徐名世溥江西新建人  
李名昌祚字來園湖廣漢  
陽人壬辰進士官廷尉

董文友嘗言予與訃士非惟文章道同覺性情俱與

我近

陸麗京目徐世臣勵志箕山斐然述作方之西園偉

長非特不愧

陸麗京年德轉升往往領袖羣彥然虛懷沖挹不自  
滿假或問卿自比稚黃志伊如何陸曰志伊學海稚  
黃雅宗故當不及

陸麗京與陳際叔孫宇台齊名友善一日聯袂出北  
郊道傍觀者竊歎曰此三人定爾殊常何乃神理都  
肖

陸麗京云西陵儷語家有靈蛇若儼胡秀如春采仲  
昭絢若朝霞故當並推

仲昭姓王名嗣槐浙江錢塘人慷慨善談論于書無所不究文詞瑰麗尤工爲賦已未召試特授內

閣中

書

毛稚黃嘗言西陵有三絕林玉達文搏抗神光雲行  
雨步陸儂胡駢體行控送于絕麗能使妙義廻環而  
來張祖望詩蒼澹頓挫如大漠風莽莽無極

陸拒石年十五作春郊賦詞藻流美筆不停綴麗京  
云王筠芍藥遜其敏正平鸚鵡讓其工

惲正叔過毛稚黃飲謂毛曰曩未識駿男然得阿虎  
令人有雄舉之思虎固當勝耶毛曰駿神鋒豪上虎

亦儁快正如蒲梢駃騠並驅康莊未知誰先後耳  
毛稚黃過夾城陸氏出語人曰吾始交蓋思侗儻英  
澈器爲國寶登其堂仲季出揖高仲骨削神藹晬然  
升璜鸞聳驥逸卓卓欲度諸兄已茂林公扶杖出肅  
然穆然使人瞻之不見所屆

茂林名之遇字際明浙江錢塘人抱材不偶學使  
者辟爲越州教授非其志也山巔水涯晚而自放  
所與遊者惟處士徐野君雪厂道人余體崖道士  
餘人罕觀其面烟波上下裙屐蕭閒望見者以爲

古狂狷者流

高仲名售善書

升璜名雋能詩工篆刻

羅隨園嘗言老而好學有德有言吾敬張君祖望博

聞強記不妄許可吾敬毛君稚黃雕龍繡虎與物無  
競吾敬丁君素涵閉戶著書朗有卓識吾敬李君東  
琪汪洋千頃能以度勝吾敬沈君開先情辭斐亶波  
瀾老成吾敬孫君宇台

羅名賢字倍千陝西華州人七世官郎署代有聞  
人爲關中貴族之冠七歲侍客飲客屬對曰山頭  
玉井蓮卽應聲曰天上金盤露客異之比長益好  
吟咏嘗至京師名重公卿叅軍泉幕無事日與西  
陵耆舊放情詩酒久不得調益歌嘯自  
如有子名姓年十四能文章有父風  
丁名濬沈名峻曾浙江仁  
和人李名式玉錢塘人

規箴



王阮亭性和易寬簡好獎引氣類然人以詩文投謁者必與盡言其失得不稍寬假

汪舟次兄弟好古力學名沸大江南北戶外屨常滿父意歉之誠曰吾不願爾曹爲名士名如剪綵鏤棘實不存也爾曹與人交以其文無寧以其行郭泰之異茅容庾袞之敬褚德豈爲名高哉爾曹慎之

汪父名汝蕃字生伯自言生平無異人惟不欺二字反復無愧耳嘗築友善菴出米數百石賑飢身與妻子粗糲自如亂後家中落乃整飭餘緒每得金卽贖屯營婦女歸其家又埋齒掩骼二十年內

積糶千餘

蕪州顧赤方出其詩與施愚山相讎校嘗握手笑曰  
吾儕本相好攻瑕索垢常猛鷲如寇讎毋畱纖塵爲  
後人口實時歎爲名言

顧名景星湖  
廣蕪州人

文與也作畫頗得待詔家法然多率爾之筆汪鈍翁  
規之曰此事定須霞思雲想刻意經營奈何頽唐落  
墨便布人間

文名點江  
南吳縣人

鄒子先趙砥之並居吳江之西郊亂後邑人多謝去

子衿俄學使者來傳相告言不出且遣戍趙頗心動  
鄒正色曰我輩但當論是非不當計利害於是遂止  
趙每爲人言微鄒君幾喪吾守

鄒名甲芳趙名瀚並江南吳江人時論鄒  
之剛決不撓趙之服義推美君子兩賢之

捷悟

喬文衣夜半過午門前萬籟俱寂猛思日中百億生  
靈今歸何處人世升沉如此而已

喬名鉢直隸內  
邱人官司城

安西估魏丙買卉布上海市中夜就旅宿醉臥風雨

大作失囊金三百兩時上海令爲任待菴素善讞至是獄不能定因詣城隍廟禱于神請以實告乃畱捕隨往者使待命于神寢宮捕夢寢宮有幼婦出右手抱細女左手挈衣與之及接視則裙襴也歸以告令令俯首再三仰而曰夫賜衣而得裙襴則非衣也非衣者裴也豈有裴姓其人者耶捕叩頭曰似也閭左有裴愛無厲不事家人產其人僦旅舍傍而得出入于其舍卽欲得裴姓此當是令曰然然則其抱細女者抑可知矣夫細女愛女耳吾聞納音之數陽姓從

左今左非衣而右愛女其爲裴愛無可疑者遂收裴  
拷之得實

任名辰旦字干之浙

江蕭山人丁未進士

計甫草雪後攀鐵索造日觀峯不見日出于峯之傍  
見豐碑屹立大書禮爲人子不登高不臨深數言計  
再拜稽首其下卽杖策下山不復登

陸麗京誦讀明敏善思誤書嘗閱韓非子至一從而  
咸危曰是一徒而成邑也後令他人覆射無一合者  
惟弟左城中之

左城名堦神骨

軒朗詞令宏通

胡循蜚官湘東司李時定南王駐師于衡一日召胡至帳下曰軍中有馬數千需櫪五百具命若三日爲期過期斬胡出已暮至江孺適有人跣足立星露中顧謂非司李胡公耶何爲至此胡告之故曰小人家于江有漁艇百餘破其一可得櫪五六具請後二日以報五百具鱗次江上胡進之王王大悅

胡名貞開一稱瑟菴浙江杭州人生數歲祖襟裳中丞見其超邁不羣授以書數行並下性喜任俠旁通藝流諸術每雄談四座爲辟易已卯舉于鄉會流寇猖獗詔下大司馬鄉貢中式後別試騎射

一日有司集壇下較射多鞠躬謝不敏胡獨出一躍上馬彎勁弓抽矢三發皆中的遂擢異等及遭鼎革自甘放廢開府張公物色之辟至軍門備茶謀尋授湘東司李有惠政未幾告歸畜聲伎與人言雜詠諧調笑自稱耳空居士工書愛畫石爲文絕類蘇長公才大用小有志不就時論惜之

### 夙惠

徐電發蚤歲韶令天姿英敏年十二和無題詩有殘月無情入小樓之句長老咸嗟異之

魏昭士生甫二十餘月母口授歸去來辭及九歌一二章久之輒能背誦諸父嘗抱持誘以果餅使歌之聲悠揚可聽相詫爲英物

魏名世做江西寧都人是和公子性狷急勇於事  
仲父冰叔嘗稱其爲文鋒銳所至往往有沒羽之  
力

沈漢儀總角時嘗從父公趾遊苑中公趾曰名卉不  
乏何以淵明愛菊對曰淡而能久也父歎曰此兒出  
語可人

漢儀名家恒一字  
巨山浙江建德人

沈孚先十歲著大臣論稍長尚風節嘗讀漢書黨錮  
傳至度遼將軍皇甫規自以西州豪傑不得與黨人  
上書自訟沈捉筆填其下曰時蕭山沈功宗以童子



同將軍上書其慷慨如此

沈名功宗浙江蕭山人工詩善書法遇練素必移  
易書滿好談每夜分列廣氈置蠟槃其中箕坐與  
客談達曙不寐

許彝于是許勉無子勉無讀書竟夜不輟許每臥聽  
父讀書且輒默誦父歎曰兒臥時乃過我醒時

卓有枚七歲出就塾師使讀論語有枚嘗置一本掩  
所讀書下時竊觀塾師發視則司馬公通鑑也師以  
此奇之

有枚工部去病少子也浙江仁和人  
生有異稟父比諸枚少孺因名曰人  
卓負經世才著有古文集

世行

虞景銘十歲卽善屬文嘗薄柳州乞巧更作辭巧文  
識者知其遠到

虞名黃吳浙江石  
門人丙午孝廉

吳威卿七歲嘗侍客坐客論詩無孤獨連文者吳應  
聲荅曰孤雲獨去閒非佳句耶一坐驚歎

吳名鷹  
錦雯子

章言在幼從塾師學師出有友訪之比歸羣兒告以  
故而忘其姓氏師怒呵羣兒章曰毋怒也我猶能約

略記之因以筆狀其顴額鬚眉栩栩然也師見而笑曰是得非某乎已而叩之果然

章名谷一稱古愚居北郭聖堂橋其地古名散花灘因又稱散花主人少時瞳神如秋水膚色如玉人多比之爲衛洗馬嘗抵豫章買舟歸浙有美姬附舟尾見章貌而悅之數以足挑章章起默自念曰我違父母膝下久今此江有神倚一涉汙邪致干神譴葬于魚腹卽何日得復見父母乎不覺泣下遂整衣冠危坐達旦善八分隸體畫尤工絕爲時所稱

趙禹功九歲父遊學歸大雪不能舉火出古畫一幅命禹功詣友所易米不得家人悵然禹功閉戶乃吟詩曰吾家有古畫其價重連城不易街頭米歸來雪

滿畧父聞之笑曰有子如此飢亦何憾

趙名甸浙江山陰人母性嚴小不豫跽請備至嘗出妻數月感悟始返里中稱趙孝子

宗定九子舉兒年五歲曾同諸兒戲于庭一兒指月中言曰月中那得有桂樹舉兒曰汝謂月中桂樹爲奇彼天地間之有樹當亦奇耶

舉兒名學詩貌甚清貴善言辭喜讀書性和雅能體父母意父定九謂其識見動作俱不似稚子所爲六歲卽殤父甚哀之

王丹麓座客常滿有客謂孔子無鬚衆詰其說客曰本孔叢子子思告齊君曰先君生無鬚眉天下王侯

不以此損其敬故知今像多鬚誤也時丹麓子鼎六  
歲在側應聲曰然則孔子亦無脅也客語塞

鼎字用和器度端重聰慧性成喜讀書講習便能  
了了行文亦時露新穎八歲學吟詩有無情風雨  
過花落不成春之句客有談及紅顏薄命者則舉  
大學集註中天天少好貌一語爲証以爲天字讀  
作上聲卽妖義也十二  
歲卽爲識者謂其識云

王丹麓病起畏寒每當雪夕閉戶謹風時幼子小能  
五歲坐著鄒上曰大人寒故畏風抑知風亦畏寒王  
問故荅曰風不畏寒何由喜撲人懷

小能是丹麓第五子資性聰敏容貌端好孝事父  
母迥異凡兒四五歲時荅頭負經市上見者莫不

噴噴稱羨甚  
欲連手繫之

今世說卷五  
終